

Islam agama untuk manusia sejagat



Bersama
Prof Dr Taufiq
Yap Yun Hin

Jumlah penduduk Malaysia kini hampir menjangkau 32 juta orang. Menurut Jabatan Statistik Malaysia, peratusan penduduk pada tahun 2010 membabitkan Bumiputera 60.3 peratus, Cina 24.6 peratus dan India 7.1 peratus.

Daripada peratusan ini, 60.4 peratus beragama Islam, 19.2 peratus Buddha, 9.1 peratus Kristian manakala 6.3 peratus adalah pengikut Hindu dan selebihnya mengamalkan ajaran Konfusianisme, Taoisme dan agama tradisi Cina.

Kepelbagaiannya bangsa, kaum dan agama ini mewujudkan masyarakat yang dipenuhi dengan

pelbagai adat, bahasa dan budaya.

Interaksi sosial dalam kepelbagaiannya antara kaum dan bangsa yang berlainan ini amat menarik dan memerlukan kefahaman mendalam.

Hampir keseluruhan umat Islam di Malaysia berbangsa Melayu. Di samping itu, satu peratus daripada penduduk Cina Malaysia dan 3.8 peratus daripada penduduk India Malaysia beragama Islam.

Walaupun keseluruhan orang Melayu di Malaysia beragama Islam, ini tidak bermakna Islam adalah agama untuk orang Melayu saja. Islam harus dilihat secara lebih luas iaitu ia adalah agama universal dengan jumlah pengikut kedua terbesar di dunia.

Tiada had sempadan wilayah dan jenis bangsa yang beragama Islam.

Jumlah orang Islam di China melebihi keseluruhan penduduk di negara ini.

Islam dipraktikkan di seluruh dunia termasuk di negara Barat yang bukan Islam. Ada Inggeris Muslim, Amerika Muslim, Afrika Muslim, Jepun Muslim, Cina Muslim dan banyak lagi.

Bagaimanapun, adakah Islam yang dianuti itu adalah Islam yang sama? Semuanya adalah Muslim dan mengamalkan Islam yang sama. Dasar kepercayaan adalah memperakui Allah sebagai Tuhan Yang Esa dan kerasulan Nabi Muhammad SAW.

Namun, bagaimanakah pengamalan harian mereka dilihat seolah-olah berbeza antara satu sama lain dari segi penampilan dan makanan?

Mereka boleh mengamalkan tradisi dan

budaya yang berbeza tetapi dari segi konsep ketuhanan mereka tetap sama.

Cara menyembah Tuhan juga adalah sama dan arah menghadap kiblat sewaktu solat adalah sama. Semuanya menghadap arah yang satu.

Kepelbagaiannya budaya yang wujud diterima oleh Islam, sekali gus menunjukkan ciri dinamik ajaran agama yang mulia ini.

Mengikut prinsip Islam, urusan hal ehwal sosial dan hubungan komunikasi sesama manusia mengikut budaya dan adat resam masing-masing.

Sepanjang sejarah Islam, Muslim di Afrika dan Asia mengelakkan cara hidup mereka tanpa mengabaikan prinsip agama serta tetap berpegang teguh dengan hukumnya.

Budaya yang tidak bercanggah dengan Islam boleh terus diamalkan. Ia tidak dihapuskan selagi ia tidak bertentangan dengan prinsip agama. Ini seperti yang kita dapat lihat dalam masyarakat Muslim Arab, Turki, Asia dan Afrika.

Apa makna budaya sebenarnya? Budaya adalah nilai kebersamaan dari segi pengetahuan, kepercayaan, pemikiran, adat resam, idea, tabiat dan pelbagai perkara lain yang biasa antara ahli masyarakat tertentu.

Budaya juga didefinisikan sebagai rangkaian amalan yang kompleks serta pengetahuan dan idea terkumpul wujud dalam interaksi sosial dan kumpulan manusia tertentu.

Aspek tingkah laku manusia seperti bahasa, amalan sosial seperti kekeluargaan, jantina dan perkahwinan, bentuk

ekspresif seperti muzik dan tarian, upacara, agama, teknologi, tempat tinggal serta pakaian dikenali sebagai budaya sejagat yang biasanya wujud dalam semua masyarakat manusia.

Budaya berbeza antara satu masyarakat dengan masyarakat yang lain, wilayah ke wilayah atau negara ke negara lain dan ia menjadi identiti mereka.

Amalan yang tidak bercanggah dengan Islam seperti tiada unsur penyembahan kepada objek boleh diteruskan.

Islam tidak terikat dengan mana-mana budaya bangsa kerana ia sesuai untuk semua bangsa dan tetap relevan sampai bila-bila.

Penulis ialah Presiden Persatuan Cina Muslim Malaysia (MACMA) dan profesor di UPM